

■ BALLAPEI

Schluein Glion resta sil secund davos plaz

(anr/hh) Schluein Glion ha spiars la davosa partida da quest atun dil campiunadi regional da ballapei dalla 2. ligia a casa encunter Altstätten cun 1:3. Cun quei restan ils Sursilvans ella zona dalla relegaziun, respectivamein sil secund davos plaz. Il disavantag sils concurrents sur il streh munta quater ni dapli puncts.

En 3. ligia ha Domat festivau la novavla victoria egl endischavel giug. Cun quei success resta l'equipa dil Plaun capogruppa sur igl unviern cun in clar avantatg sils ulteriurs concurrents.

El campiunadi dalla grupp 2 dalla 4. ligia ha Danis-Tavanasa battiu a casa Val cun 2:1. Grazia a quella victoria semigliura Danis-Tavanasa sil quart rang ella tabella. La distanza tiel capogruppa Vazsut munta tschun puncts.

2. ligia, grupp 1

Vaduz – Rapperswil-Jona	1:2
Bogn Ragaz – Widnau	1:2
Ruggell – Buchs	1:4
Weesen – Au-Berneck	6:1
Schluein Glion – Altstätten	1:3
Montlingen – Mels	1:2

1. Buchs	11	8	2	1	37:17	26
2. Au-Berneck	11	7	2	2	36:26	23
3. Weesen	11	7	2	2	25:11	23
4. Montlingen	11	6	2	3	29:18	20
5. Mels	11	6	1	4	22:25	19
6. Widnau	11	4	4	3	25:20	16
7. Rapperswil-Jona	11	4	2	5	19:18	14
8. Altstätten	11	4	1	6	22:28	13
9. Vaduz	11	3	3	5	17:18	12
10. Ruggell	11	3	1	7	15:25	10
11. Schluein Glion	11	2	0	9	14:32	6
12. Bogn Ragaz	11	2	0	9	9:32	6

3. ligia, grupp 1

Triesen – Uznach	0:1
Sargans – Cuera 97	4:1
Flums – Domat	1:2
Sevelen – Panaduz	2:3
Balzers – Tusaun-Cazas	5:2

1. Domat	11	9	2	0	34: 8	29
2. Landquart	10	6	3	1	21: 9	21
3. Triesen	11	6	2	3	24:16	20
4. Tusaun-Cazas	11	6	2	3	22:20	20
5. Cuera 97	11	5	1	5	24:20	16
6. Balzers	11	4	4	3	22:23	16
7. Sargans	11	5	1	5	21:20	16
8. Uznach	11	4	1	6	20:23	13
9. Sevelen	11	2	5	4	18:25	11
10. Valposchiavo	10	1	4	5	13:21	7
11. Panaduz	11	2	1	8	11:30	7
12. Flums	11	1	2	8	7:22	5

4. ligia, grupp 2

Danis-Tavanasa – Val	2:1					
1. Vaz-sut	10	7	2	1	31:10	23
2. Taminata	10	6	2	2	25:14	20
3. Walenstadt	10	6	0	4	32:22	18
4. Danis-Tavanasa	10	5	3	2	22:11	18
5. Trun/Rabius	10	5	3	2	39:19	18
6. Lumnezia	10	5	1	4	33:19	16
7. Schluein Glion	10	5	0	5	24:21	15
8. Val	10	3	0	7	14:32	9
9. Mels	10	2	2	6	14:31	8
10. Landquart	10	2	1	7	15:38	7
11. Laax	10	2	0	8	8:40	6

■ VALENDAU

Gruppa da teater cul toc «Der Vorname»

(lq) Cun la comedia «Der Vorname» da Mathieu Delaporte ed Alexandre de la Patellière procura la Gruppa da teater da Valendau era uonn per sis seradas da teater zun divertivlas. Il professer da litteratura Pierre Garaud e sia dunna Elisabeth preparan in past festiv per amits e parents. Ins quenta cun la viseta da Vincent, il frar d'Elisabeth, e da sia dunna en speranza. Plinavon spetgan ins cun Claude Gatingol in vegl amitg dalla famiglia. Cun siu caracter egocentric procura Vincent per atmosfera, annunziand il num digl affon aunc buca naschiu, numnadamain Adolf. Quei num evoscha ina viva discussiun, ins ei digl avis ch'in affon che ha il medem num sco Hitler seigi in scandal.

Tgei ch'ei oz tut pusseivel ella medischina

Demussau grond interess per ina problematica che va sil viv

■ (anr/gc) Ei era da spitgar ch'il star-chirurg per malsognas dil cor e veinas, dr. med. Thierry Carrel, vegni d'emplenir la vasta sala dalla claustra da Mustér sil davos plaz. Aschia eisi era stau il cass il venderdis vargau el Forum. Ver success – sco Carrel – munta ton admiraziun sco gronda calamita. Quei ei semussau tier il professer dall'Universitad da Berna e directur dalla chirurgia per il cor egl «Inselspital» da leu.

Sfidas biomedicinalas

Malgrad il grond success medicinal tschenta il referent introducend la damonda: Tgei san ins tut far ed ei era giavischeivel ella medischina? Inaga fuvu bia giavischau, mo pauc pusseivel, oz perencunter ei bia pusseivel, mo eisi era giavischeivel da far tut? Sco sfidas valien inagada la demografia, essend ch'ils carstgauns vegnien adina pli vegls. Ei sto dar permanentamein innovaziuns per haver success. Ins pretendi era adina dapli. La damonda denter etica ed economia setschenti era. La sanadad cuosti en Svizra adina dapli. Ad onn eisi buca meins che 70 milliardas francs. En consequenza da quei s'augmentan era las premias dallas cassas da malsaus, quei che mintgin senta.

Sco principis biomedicinalas vegnan allegai: Haver quitau, tgirar, respect dall'autonomia dil pazient e schar reger giusta visavi tuts. Ei va per cumbatter ils simptoms, migliurar la qualitat da viver e lu far danvonz tutta tgira. Avon mintga operaziun setschentien las damondas: Tgei san ins e tgei ston ins far, tgei duess vegnir interpriu e tgei atgan ins insumma?



(Da sen.) Pader Urban Affentranger, menader dil Forum, Sabine Dahinden e siu consort Thierry Carrel. Ella ha salvau igl emprum Forum uonn e siu mariu il davos.

Il maletg dalla malsogna – sco basa per agir

Ei detti pli negina terapia e migliurament senza saver sebasar sil maletg dalla malsogna dil cor. Quella metoda ha bein optimau la basa da partenza da decider, mo era giu per consequenza che tut ei vegniu pli car: Medicamentaziun, applicar il cateter e lu l'operaziun dil cor malsau tochen tier metter en in cor artificial u transplantar el. Ei setraccu d'ina medischina personalisada tras il tractament il pli efficient cun operar

adina pli schanegiontamein per ch'ei detti aschi paucs effects secundars sco pusseivel.

Il referent ha era tangau las consequenzas economicas-finanzialas da talas pretensiusas e custusas operaziuns. Con astga la veta (il vegnir sauns) insumma custar? Zcontas cefras han fatg sortir – tut tenor cass – expensas exorbitantas per medicamentaziun ed operaziun. Tuts participai – il pazient e siu contuorn – seigien dumandai en quei cass. En siu cudisch «Von Herzen» presenta

Carrel 30 cass (pazients). Entgins de cuors ha el era commentau. Facit: Il chirurg per malsognas dil cor seigi adina confruntaus cun la damonda da pesar giu denter tgei ch'ei pusseivel e giavischeivel. Quei metti el en ina situaziun ton da tensiun cuzzonta sco da sfida permanenta.

Las expectoraziuns da Carrel davart la chirurgia e l'operaziun dil e vid il cor sco era la sort da ses pazients salvai han impressiunau fetg. Il liung applaus ei staus meritaus.

Mantener la pumera aulta entuorn Sagogn

■ La Pro Sagogn ha saviu exequir igl onn 2016 las empremas lavurs el rom dil project «manteniment dalla tschenta da pumera aulta da Sagogn». Igl unviern 2015/16 ein las differentas lavurs da preparativas vegnidas fatgas e la primavera ha la Pro Sagogn entschiet cun las empremas lavurs da tgira en entgins curtgins. Per promover la biodiversitad ei vegniu pendiu si pliras casettas d'utschals per il cuacotschna da curtgin ed il volvatgau ed igl apicultur Anton Panier ha piazzau dus pievels d'aviuls en in curtgin. Igl atun han voluntarias e voluntaris gidau per l'emprema ga la Pro Sagogn da raccoltar e nezegiar la puma. Duront plirs gis han mintgamai tochen 20 personas da Sagogn e contuorn, mo era dalla Lumnezia e dalla Bassa, prestau bunamein 400 uras da lavur cumina. Ellas han raccoltau varga 4500 kg meila en 13 curtgins. La puma ei vegnida offerida alla Pro Sagogn da proprietaris che havevan gia raccoltau avunda ni che savevan, per exempel ord vegliadetgna, buca raccoltar pli sezs ella.

Ord quella meila ei vegniu fatg 2105 liters must buca filtraus e bien 30 kg meila turrada. Il vinars da Sagogn suonda proximaimein. La pumera e la puma ein mai vegnidas sprizzadas, ils products han negins mieds da conservar ed els ein vegni produci ella regiun. Il must ella mustaria a Glion, il vinars tier la Destillaria Daguot a Glion e la meila turrada a Sagogn. Aschia ein ils products fetg naturals ed indigens.

La Pro Sagogn engrazia fetg als voluntaris, als proprietaris da curtgins ed als cultivaders per lur grond sustegn e spera ch'ella sappi era cuntinuar quei project cun success ils proxims onns ed aschia gidar a mantener la biala tschenta da pumera aulta da Sagogn.

Annunzias, damondas ni empustaziuns da must ni meila turrada p.pl. a: info@prosagogn.ch. Dapli informaziuns sut www.prosagogn.ch

Pro Sagogn, Alois Poltéra



La pumera aulta entuorn Sagogn.



Ils gidonters han fatg biara lavur.

FOTOS MAD